

### Aqua turbia no fa specio

Ogni bocia, fin dal primo ano de vita, el taca a inparare calcosa e, drioman, el taca a parlare, a doparare el sculiero e el piron, a conóssare la mama e la nona, ma ...atenti!

Me vien da dire che turbio vol dire "torbido", no lànpido, come se chi che leze no lo saéssesse za; ma mi ghe fraco dessorà parché sta parola la xe proprio quela che ghe dà sostanza a tutto el discorso.

E cossa ghe èntrelo el bocia?

Quelo che inpara on bocia, on toseto, on tosato, on cèo, on butel, on buteleto, on putin, on fantolin, on putelo, on bagatello, on butin, on canai, on snarocioso, on cògol on... insoma, come che i ghe dise in qua e in là pa 'l Veneto (che Dio benedissa Luigi Nardo!) el lo inpara prima de tuto in casa, ma anca foravìa.

El specio, l'esempio, xe quello che pol fare de on toseto, tosato, bocia... on galantomo opure on desgrazià.

La xe na roba, questa, ca se desmenteghemo massa spesso, spece noantri grandi, ca ghe disemo "no fumare", "no dire parolaze", "pòrtaghe rispetto" e po' a semo noantri che par primi no rispetemo, sparlacemo, fumemo, no portemo rispetto e 'ndemo zo col goto.

No serve a gnente scrivare on libro so quello che se dovaria fare, se dopo no 'l se fa, e cussi a finiemo par inturbiare l'aqua, chel'aqua dove che i nostri tusi, butèi, cèi... i dovaria riussire a speciarse par farsene strada sol mondo.

So on fosso pien de paltan xe fadiga speciarse, ma so on

### Chi che paga avanti el trato, servizio mal fato

Qua no semo al filò, ma a l'Università, a la "facoltà" de economia, altro che bale!

El vecioto, quelo che se ga dà da fare par spizolire sto proverbio, intendémose ben, no credo che 'l volesse insegnarghe a so neùdi che no bisogna pagare quello che se ga cronpà. Questo no sarà fatto ben!

Pitosto, el ne mete in guardia par no ciapare calche inbus-solotada, cantonada, fregadura, ciavada, insoma!

S'a volemo vardare ben, po', ste oto-diese parole le pare fate aposte par noantri del vintiunésimo secolo, ca credemo de saverla tanto longa!

Penso ca gabiè fato caso tuti a quello che sucede par la television, quando ch'i taca co l'areclan; prima i te inbriaga par farte vegnere òja de calcossa che gnanca te saìvi che la ghe fusse, po' i te fa védare che sta roba la ga anca la mussa del strazaro e po', sicome che ti no te la ghè, i te fa passare par èbete: "Come, ma sito senza sto argagno moderno? Vargognate!"

A la fine te fè l'afare, ordenando sta roba par telefono, in-debitàndote fin al colo par tre jenerazion e...

"Gheto pagà prima de védare la merce?", te domanda alora el nostro vecioto, quelo del proverbio.

Eh sì, caro mio. Gheto pagà prima oncora de palpate, tocare, tastare, fustegare el to aquisto? De sicuro, avendo za pagà, te ris-ci de catarte par le man on strafanto, senza podere protestare co nissuni e costreto, inveze, a sacramentare da ti solo